

**Wakil Melaka Garis Lima Elemen Perkasa Teraju
Bernama
02 Disember, 2011**

KUALA LUMPUR, 2 Dis (Bernama) -- Umno Melaka menggariskan lima elemen bagi memperkasa Unit Peneraju Agenda Bumiputera (Teraju), sekaligus meningkatkan kekuatan orang Melayu dalam sektor ekonomi.

Wakilnya, Datuk Abdul Ghafar Atan berkata, Teraju perlu dilaksanakan di peringkat negeri bagi memudahkan unit itu mengenal pasti usahawan berpotensi di dalam negeri tersebut untuk menerima bantuan.

Ketua Umno Bahagian Alor Gajah itu berkata, unit itu perlu bekerjasama dengan agensi kerajaan, Dewan Perniagaan Melayu Malaysia dan persatuan-persatuan berkaitan serta melantik Ketua Menteri atau Menteri Besar sebagai pengerusi dalam merangka strategi dan pembangunan untuk usahawan.

"Saya difahamkan Teraju ketika ini menerima permohonan bantuan yang semakin bertambah namun mempunyai kekangan kakitangan yang terhad untuk mengendalikannya, jadi dengan penubuhan Teraju di peringkat negeri ini dapat mempercepat proses permohonan dan kelulusan," katanya ketika membahas usul ekonomi pada Perhimpunan Agung Umno 2011 di sini.

Katanya, agensi dan persatuan di peringkat negeri juga lebih arif tentang usahawan dan produk berpotensi untuk diketengahkan ke peringkat lebih tinggi.

Selain itu, Abdul Ghafar berkata Teraju perlu diberikan kuasa entiti yang sama seperti Unit Pengurusan Prestasi dan Pelaksanaan (Pemandu) dengan Ketua Pegawai Eksekutifnya (CEO) mempunyai kuasa bertaraf menteri.

Beliau berkata, kerajaan juga perlu menambah peruntukan kewangan kepada Teraju bagi membolehkan unit itu merancang program yang lebih menyeluruh terhadap usahawan Bumiputera.

Katanya, unit itu harus mesra badan bukan kerajaan (NGO) berkaitan bagi mewujudkan aura mesra perniagaan.

Elemen kelima katanya ialah Teraju perlu memberi fokus terhadap usahawan Bumiputera pertengahan dan bawahan yang lebih memerlukan bantuan untuk maju dalam sektor ekonomi.

Teraju ditubuhkan pada 2 Feb lepas dan penubuhannya diumumkan secara rasmi oleh Perdana Menteri Datuk Seri Najib Tun Razak pada 8 Feb 2011.

Penubuhan Teraju bertujuan untuk menerajui, memacu serta menyelaras agenda Bumiputera ke arah negara maju, berpendapatan tinggi, berdaya tahan serta berdaya saing.

--BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=631505>